

REGIONE AUTONOMA DE SARDIGNA

PRESIDÈNTZIA

Prot. n.2754

Ordinàntzia N.9 de su 14 martzu 2020

Chistione: Dispositziones Atuativas de su Decretu de su Ministru de sas Infrastruturas e de sos Trasportos cuncordes cun su Ministru de sa Salute n. 117 de su 14 martzu 2020 pro su cuntrastu e sa preventzione de sa difusione epidemiològica dae COVID-2019 in su territòriu regionale de sa Sardigna. Ordinàntzia in cunforma de s'art. 32, comma 3, de sa lege 23 de nadale 1978, n. 833 in matèria de igiene e sanidade pùblica.

Su presidente

BIDU s'art. 32 de sa Costituzione

BIDU s'Istatutu Ispetziale pro sa Sardigna e sas normas de atuatzione chi li pertocant

BIDA sa lege regionale 7 ghenàrgiu 1977, n. 1 chi tratat "Normas subra de s'organizazione amministrativa de sa Regione Sarda e subra de sas competèntzias de sa Giunta, de sa Presidèntzia e de sos Assessorados regionales"

BIDA sa Lege 23 de su mese de nadale 1978, n. 833 "Istituzione de su servìtziu sanitàriu natzionale" e mescamente s'art. 32 chi tratat "Su Ministru de sa sanidade podet emìtere ordinàntzias de caràtere contingibile e urgente, in matèria de igiene e sanidade pùblica e de politzia veterinària, cun eficàtzia in su su territòriu natzionale intreu o in parte de su territòriu natzionale chi cabet prus regiones", e fintzas "in sas matessis matèrias sunt emìtidas dae su presidente de sa giunta regionale e dae su sindigu ordinàntzias de caràtere contingibile e urgente, cun eficàtzia in sa regione o in parte de su territòriu chi cabet prus comunes e in su territòriu comunale"

BIDAS sas Ordinàntzias de su Presidente de sa Regione Sardigna n. 2 de su 24.02.2020, n. 3 de su 27.02.2020, n. 4 de s'8.03.2020, n. 5 de su 9.03.2020 e nn. 6,7 e 8 de su 13.03.2020

BIDU su decretu-lege 23 freàrgiu 2020, n. 6 chi tratat "Mesuras urgentes in matèria de cuntenimentu e gestione de s'emergèntzia epidemiològica dae COVID-19 publicadu in GU Sèrie Generale n.45 de su 23.02.2020, vigente a su 23.02.2020, e mescamente s'art. 3 comma 2;

BIDOS sos Decretos de su Presidente de su Consìgiu de sos Ministros de su 1 martzu 2020 e de su 4 martzu 2020;

BIDU su Decretu de su Presidente de su Consìgiu de sos Ministros in data 8 martzu 2020 e mescamente s'art. 5 comma 4;

ISCUMPROADU chi sas persones chi est tzertu chi siant positivas in su territòriu de Sardigna sunt bènnidas dae logos giai luados dae sa maladia;

ISCUMPROADU chi pro efetu de sas mesuras urgentes pro evitare sa difusione de su COVID-19, adotadas cun sos provvedimenti atuativos mentovados subra, su movimentu de sa gente chi est

colada o s'est firma o est istada pro traballu o istùdiu in sos territòrios de cussas chi lis narant zonas rujas no est agabbadu ma est semper creschende fintzas ca in Sardigna b'at domos meda de vacàntzia;

RITÈNNIDU chi est netzessàriu fàghere atziones de preventzione, e chi custa situatzione nos òbligat a assumere deretu cada misura de cuntinimentu e gestione adeguada e proportzionada a su crèschere de s'epidemia, sebestende precautziones chi siant de giudu pro parare fronte comente si tocat a sos arriscos chi podent nòghere a sa populatzione;

LEADU A CONSIDERU chi intrende in Sardigna gente a fijos bènnida dae sas zonas cun prus arriscu podet èssere chi, sena controllu perunu, intrent persones chi podent cundire su virus e custu diat èssere unu dannu mannu pro sa salute pùblica;

LEADU ATU de sa capatzidade totale attuale de su SSR de pòdere afrontare una crèschida esponenziale de s'arriscu de sas cundiduras e sa netzessidade chi nde sighit de loges in sos letos de terapia intensiva e pneumologia;

BIDU su Decretu de su Ministru de sas Infrastruturas e de sos Trasportos cuncorde cun su Ministru de sa Salute n. 117 de su 14 martzu 2020, chi suspendet fintzas a su 25 de martzu 2020 (francu autorizatziones dae su Presidente de sa Regione cun esigèntzias dimustradas e improrogàbiles mentovadas in s'art. 1, lìtera a) de su DPCM 8 martzu 2020;) su trasportu de sos passeggeris dae e pro sa Sardigna in aèreu e in nave;

DADU ATU de s'urgèntzia de disciplinare sas modalidades atuativas de su D.M. n. 117 de su 14 martzu 2020, mescamente su protzedimentu autorizatòriu sa gestione in manera transitòria de sos bolos e de sas naves in sas dies de oe e de domìniga 15 de martzu;

ISCUMPROADA fintzas, s'urgèntzia e su de non pòdere diferire s'adotzione de mesuras istraordinàrias a tutela de sa salute de sos tzitadinos sardos pro sa preventzione e su cuntinimentu de sa difusione in su territòriu de sa Regione Sardigna de su COVID-19, in cunforma a s'art.32 de sa Lege 23 de su mese de nadale 1978, n. 833 in matèria de igiene e sanidade,

òrdinat

Art. 1) Su tràficu passeggeris in sas lìneas marìtimas dae e pro sa Sardigna est suspesu fintzas a su 25 martzu 2020. Francu, pro esigèntzias proadas e improrogàbiles ebbia, sa possibilitade de rechedere autorizatzione a s'imbarcu in cunforma a s'art. 1, comma 1, lit. a de su DPCM 8 martzu 2020, est a nàrrere:

- a) esigèntzias de traballu o situatziones de netzessidade;
- b) ispostamentos pro motivo de saludu;
- c) torrada a su domitzìliu, domo, residèntzia pròpia;

Totu sos chi sunt mentovadas dae su comma iscritu subra e si cherent imbarcare in sas naves in linia intre sa Sardigna e sos portos de sa Penìsula e a s'imbesse in su tempus chi est vigente su D.M. n. 117 de su 14 martzu 2020 depent presentare rechesta de autorizatzione preventiva a su nessi 48 oras in antis de cando diant dèpere partire cun su modellu ligadu a custa ordinàntzia cun sa lit. "A", chi cheret cumpiladu e mandadu in via telemàtica, in cunforma a cantu iscritu in sa setzione "Nuovo Corona virus" de sa homepage de su situ istituzionale de sa Regione Sardigna (www.regione.sardegna.it), paris cun s'autotzertificatzione chi atestat sa cundizione personale

pròpia.

Su Presidente de sa Regione, in calidade fintzas de Autoridade sanitària regionale, si avalet de un'istrutura apòsita in sa Direzione Generale de sa Protezione Tzivile pro s'istrutòria de sas demandas e pro lassare sas autorizatziones, chi ant a èssere comunicadas a s'indiritzu de posta eletrònica de su chi at fatu rechesta ebbia, intre 12 oras dae sa partèntzia.

Su passeggeri at a dèpere presentare còpia de s'autorizatzione paris a sa carta de imbarcu e a unu documentu de identidade in bàlidu.

Sa cumpangia de navigatzione, cun s'agiudu de sos addetos incarrigados dae sa Regione e paris cun s'Autoridade de Sistema Portuale de su Mare de Sardigna e – in intro de su servìtziu fatu istituzionalmente – dae sas fortzas de s'òrdine presentes, verificat in antis de s'imbarcu si sos passeggeris tenent sas autorizatziones.

Si sas unidades de imbarcu isoladas non si podent imbarcare, sas esigèntzias de imbarcu de sos autistas de mezos guidados adibidos a su trasportu mertzes intrans in sa fatispètzie de sa lit. a) comma 1 de custu artìculu.

Art. 2) Su tràficu aèreu passeggeris dae e pro sa Sardigna est garantidu fintzas a su 25 de martzu 2020 dae s'aeroporto de Casteddu ebbia e pro esigèntzias dimustradas e chi non si podent prorogare. Mescamente est garantida sa possibilidade de autorizare s'imbarcu de passeggeris in cunforma a s'art. 1, comma 1, lit. a de su DPCM 8 martzu 2020, est a nàrrere:

- a) esigèntzias de traballu dimustradas o situatziones de netzessidade;
- b) biàgios pro salute;
- c) torrada in su domitzìliu, domo o residèntzia pròpia.

Sos chi in su tempus chi est vigente su D.M. n. 117 de su 14 martzu 2020, intrans in custu comma e si cheret imbarcare in sos bolos de lìnia assegurados cun s'aeroporto de Casteddu depent presentare rechesta de autorizatzione preventiva 48 oras in antis de sa partèntzia cun su modellu ligadu a custa ordinàntzia cun sa lit. "A", chi cheret cumpiladu e mandadu in via telemàtica, in cunforma a cantu iscritu in sa setzione "Nuovo Corona virus" de sa homepage de su situ istituzionale de sa Regione Sardigna (www.regione.sardegna.it), paris cun s'autotzertificatzione chi atestat sa cundizione personale pròpia.

Su Presidente de sa Regione, in calidade fintzas de Autoridade sanitària regionale, si avalet de un'istrutura apòsita in sa Direzione Generale de sa Protezione Tzivile pro s'istrutòria de sas demandas e pro lassare sas autorizatziones, chi ant a èssere comunicadas a s'indiritzu de posta eletrònica de su chi at fatu rechesta ebbia, intre 12 oras dae sa partèntzia.

Su passeggeri at a dèpere presentare còpia de s'autorizatzione paris a sa carta de imbarcu e a unu documentu de identidade in bàlidu.

Sa cumpangia aèrea, cun s'agiudu de sos addetos incarrigados dae sa Regione e paris cun sa sotziedade de gestione aeroportuale e – in intro de su servìtziu fatu istituzionalmente – dae sas fortzas de s'òrdine presentes, verificat in antis de s'imbarcu si sos passeggeris tenent sas autorizatziones.

Art. 3) A manera transitòria e in fase de prima aplicatzione de sas dispositziones de su D.M. n. 117 de su 14 martzu 2020, fintzas pro cunsentire s'aprontamentu netzessàriu de sas protzeduras de custa ordinàntzia:

- a) sunt autorizados totu sos imbarcos giai programmados in intrada e in essida pro e dae sa Sardigna dae sos aeroportos e dae sos portos in sas dies de oe e de domìniga 15 de martzu 2020;
- b) sos passeggeris diretos, in naves o aèreatos, in Sardigna in die de oe o chi depent arribare domìniga 15 de martzu 2020 sunt autorizados a sbarcare, a poi de àere cumpiladu in pabiru, intro de su vetore, s'autodeclaratzione predisposta dae su Ministeru de s'internu in cunforma de su DPCM 9 martzu

2020 e chi si podet iscarrigare in s'indirizzu https://www.interno.gov.it/sites/default/files/allegati/modulo_autodichiarazione_10.3.2020.pdf. A custos passeggeris est aplicadu s'art. 1 de s'Ordinàntzia de su Presidente de sa Regione n. 5 de su 9 martzu 2020.

Art. 4) Custa ordinàntzia:

- est bàlida fintzas a su 25 de martzu 2020, francu pròroga esplitzita;
- est eficatze deretu immediatamente e est publicada in su situ istituzionale de sa Regione. Sa publicatzione tenet balore de notifica individuale, pro totu sos efetos de lege, pro totu sos sugetos coinvoltos;
- benit mandada in cunforma a sas cumpetèntzias issoro a su Presidente de su Consìgiu de sos Ministros, a su Ministru de sas Infrastruturas e de sos Trasportos, a su Ministru de sa Salute, a sos amministradores de sas provìntzias de su territòriu regionale, a su Sìndigu Metropolitanu de Casteddu, a sos Sìndigos de sos Comunes de sa Sardigna, a sos Prefetos de sos Ufìtzios territoriales de governu de sa Sardigna, a sos Assessoros regionales, a s'Autoridade de Sistema Portuale de su Mare de Sardigna, a sa Sotziedade de gestione de s'aeroportu de Casteddu (SOGAER), a sas cumpangias marìtimas e aèreas interessadas e a sos àteros sugetos interessados.

Si sos òbligos de custu ordinàntzia non benint osservados est previdida sa santzione in cunforma a sa lege (art. 650 c.p.), francu chi non bi siat reatu prus grave.

Contra a custu ordinàntzia est ammissu recursu giurisditzionale in antis a su Tribunale Amministrativu Regionale intre 60 dies dae sa comunicatzione, o si nono recursu istraordinàriu a su Cabu de s'Istadu, intre su tèrmine de 120 dies.

Su Presidente
Christian Solinas